

**Zeitschrift:** Igl Ischi : organ della Romania (Societat de Students Romontschs)

**Herausgeber:** Romania (Societat de Students Romontschs)

**Band:** 78 (1993)

**Heft:** 5

**Artikel:** Fullar via

**Autor:** Giossi, Bertilla

**DOI:** <https://doi.org/10.5169/seals-882639>

### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 30.07.2025

**ETH-Bibliothek Zürich, E-Periodica, <https://www.e-periodica.ch>**

**Bertilla Giossi**



**Fullar  
via**

«Avon che star a casa, far il percasa, mirar dils affons e spitgar ch'igl um tuorni dalla lavur - avon che menar ina tala veta vivess jeu persula.» Quei di Rita, ella ha 31 onn, lavura en mesa plazza per ina stizun che venda products dil tierz mund. Siu buob ha sis onns, la buoba survegn tschun. Rita ei maridada cun Jürg, lez ei redactur tier ina revista. Siu pensum da lavur munta a 60%.

«Il pli impurtont per ina buna relaziun denter conjugals ei che mintga partenari, igl um e la dunna, che mintgin hagi sper la lavur dil tenercasa e l'educaziun dils affons aunc ina occupaziun ordeifer casa. Mintgin duess haver in spazi independent dalla famiglia.» Da quei avis ei Bruno, el ha 42 onns, ei scolast en ina scola media per in pensum da 65%. Sias duas feglias han dudisch e sis onns. Maridaus eis el cun Eva che ei medemamein scolasta da scola media, ella en mesa plazza.

Rita e Bruno ein dus numbs fictivs. Lur veta e lur fuorma dalla veta famigliara ein perencunter reals. Omisdus organiseschan la veta da famiglia differentamein dalla tradiziun. La sociologia definescha la famiglia tradiziunala suandontamein: Bab e mumma cun in u plirs affons, il bab lavura ordeifer casa, el ei il nutrider dalla famiglia. Gl'intschess dalla mumma cumpeglia la educaziun dils affons, la lavur dil tenercasa ed il beinstar psichic dalla famiglia.

Quella fuorma d'organisar la famiglia ei s'ignivada en nos tgaus. Els onns tschunconta e sissonta eis ella seplaccada e dapi lu fa ella buca vang, era sche quella corrispunda gia daditg buca alla realitat. En realitat viva mo pli la mesedad dallas famiglias en Svizra tenor la fuorma tradiziunala. Tier l'autra mesedad vivan ils babs e pli savens las mummas sulets cun lur affons, ni che la lavur en casa ed ordeifer vegn

repartida autramein. Rita e Bruno ein dus exponents d'ina nova organisaziun dil «menaschi» famigliar. El sco ella s'engaschan equalmein per ils fatgs en ed ordeifer casa, las lavurs vegnan repartidas simmetricamein. Tenor la sociologia ein Rita e Bruno «geniturs simmetrics». Ord atgna voluntad han els refusau la veta da famiglia tradiziunala.

Mintga societad ha sias normas, quellas san ins cumpareglier cun vias. La societad metta a disposiziun a lur commembers entginas vias. Tgi che pren suttapeis ina da quellas sto buca legitimar siu far e damenar. Um e dunna che vivan cun affons tenor la fuorma tradiziunala ston buca declarar daco ch'els vivan gest aschia e buc autruisa. Quei ch'els fan ei normal. Suandar las normas, las vias proponidas dalla societad, preserva nus da damondas e liquidescha per nus bia decisiuns. Vias suladas dalla societad levgieschan a nus la veta dil mintgadi. Paupers nus, sche nus stuessen sedumandar per mintga pass sche quei seigi il gest, il ver - ni buc. Adina puspei scarpitschassen nus.

Pil solit van ils commembers d'ina societad per via, tscheu e leu in che va perschut. Per quels che bandunan il terren marcau ha ei num fullar sez e gliez ei stregn. Damondas sezuppan davos mintga caraun, damondas che sefutran da rispostas stereotipas. Cheu in exempl: Gl'affon ei malsauns. En la famiglia tradiziunala surpren la mumma la tgira dil malsaun, quei secapescha da sesez, negin damonda sch'ella vul ni buc. En ina famiglia da «geniturs simmetrics» setschenta la damonda: Tgi stat a casa? e lu: Tgi e per cons dis? plianavon: Quel che stat a casa, surpren quel era gest lavurs dil tenercasa? - Ina damonda cloma tschella e mintgina pretendia ina decisiun. Daco far cumplicau sch'ei va sempel? Daco sedecidan umens e dunnas per ina fuorma da famiglia che corrispunda buc alla norma da nossa societad? Ina risposta havein nus encuretg en discuors cun tschun partenaris che vivan la fuorma da «geniturs simmetrics». Lur biografias zuppentan indezis che expliceschan il basegns d'encurir atgnas vias.

### Rita: «**Pli bugen persula che aschia enzatgei**»

Adina puspei encuir l'atgna via, la forza per fullar in'atgna via vesa Rita en siu enorm basegns d'independenza. Gia fetg baul en sia veta seregheglia quei desideri en ella. Gl'emprem cumbat per sia independenza ha Rita cun biebein nov onns. Ella viva cun sia mumma, lezza ei obligada da lurror il di ora e duront quei temps ei Rita tier geniturs nutriders. Cun disgust stat ella leu, siu grond giavisch ei da star persula en sia atgna casa. Liungs e dirs cumbats ha ei duvrau entochen che la mumma lubescha a Rita da star persula a casa. «Jeu erel in affon dalla clav, e naven da quei di eis ei iu bein cun mei. En scola ein mias prestaziuns semegliuradas immediat.»

Ina episoda semeglionta ha giu liug cur che Rita haveva biebein gissiat onns. Sia mumma haveva puspei maridau ed era tras quei dapli a casa. «Jeu supportavel buca quella situaziun, jeu erel buca s'endisada dad esser controllada gl'entir di», rauenta Rita. Puspei dat ei denter feglia e mumma bravas sepicladas. Il resultat da quellas dispetas, Rita va a star en in'atgna habitaziun. La tiarza part dil cumbat per l'independenza dalla mumma sefa valer en connex cugl emprendissadi. Sin giavisch dalla mumma entscheiva Rita gl'emprendissadi mercantil. In onn fa ella per camond, in onn sgarscheivel. Lu, dad in di sin l'auter, senza dir a negin nuot, scappa Rita. Dus dis pli tard informescha ella sia mumma ch'ella tuorni buc pli alla lavur, ch'ella mondi a viver el Tessin. «Naven da quei di hai jeu propi entschiet a viver mia veta», ed ella sesenta bein. El Tessin viva ella in pèr onns cun ina gruppera da freaks e suenter viagiescha ella plirs onns pil mund entuorn. «Jeu erel adina sin la tscherca d'in englar... d'in englar che dess a mi il sentiment d'esser propi tier mei... denton quei englar hiel anflau negliu.» Ruaus anfla ella cun siu emprem affon. Ella viva persula cun el e passenta il meglier temps da sia veta. En siu plaz da lavur empren ella d'enconuscher Jürg. Els van a star ensemens, han in secund affon ed omisdus lavuran vinavon parzialmein. Viver en ina relaziun, en la quala ella fuss economicamein dependenta dil partenari, quei vegness buc en damonda per Rita. Duront sia veta ha ella empriu ch'ei va mo bein cun ella sch'ella resta independenta. Per Rita ei la fuorma da «geniturs simmetrics» buc in vuler, plitost in stuer, per siu beinstar sto ella evitar la fuorma tradiziunala dalla famiglia.

### Bruno: «**Pli stretg e mender ch'igl ei**»

Per Bruno ei la fuorma da famiglia «geniturs simmetrics» ina pusseivladad da sluccar empau il stretg mund dalla famiglia pintga. El decuors da sia affonza sviluppescha el in odi nundetg enviers la veta restrenschida en la famiglia. Ses geniturs han practicamein negin contact cun vischins e parents. En lur quater preits vegn tschintschau pauc ni nuot. Bruno seregorda cun grond disgust da quei temps. «Ei deva bia situaziuns da squetsch ed els tschintschavan buca la massa.» Bruno vegn da mitschar empau dil stretg duront il temps da scola media. Impuls per novs munds vegnan cunzun d'in scolast.

L'aversiun encunter il stretg, il pign ed il serrau, quella ei restada. Per Bruno eis ei clar: Gie buca viver persuls ni sco en ina chista cun l'amitga. Era cun Eva, sia dunna, viva Bruno biars onns en ina WG. Pér cura ch'els han in secund affon sedecidan els per ina habitaziun dapersei. «Per mei eis ei fetg impurtont da haver ina reit sociala pli vasta che quella dalla famiglia. Jeu sundel dil mein, pli el pign e stretg ch'ins s'organisescha e mender ch'igl ei.» En ina relaziun sto mintgin haver in agen spazi el qual l'atgna persuna vegn buca definida sco part dalla famiglia, in liug nua ch'el, Bruno, exista independentamein dalla famiglia. Quei vul dir in camp d'activitat nua ch'el ei buca bab ni consort, in spazi nua ch'el ei simplamein il

Bruno. In tal camp pretenda Bruno per sesez ed era per sia partenaria. La fuorma da «geniturs simmetrics» lubescha ad omisdus da semover en spazis independets dalla famiglia.

### **Metter tiarms en dus loghens**

Diesch biografias vein nus analisau e tier tuttas havein nus anflau in fil tgietschen cumparegliabel. En la veta da tuttas diesch persunas gioga il metter cunfins e l'indipendenza ina rolla particulara. Secapescha che mintgin senta quei basegns differentamein, quei muossan gia ils dus exempels da Rita e Bruno. Rita vul en emprema lingia esser independenta da sia mumma, Bruno perencunter sedosta dils stretgs ligioms che la famiglia tradiziunala tschenta.

Redimensionar ils aspects individuals dil basegns dad indipendenza lubescha da cumpareglier las diesch biografias. Gl'interessant da quella cumparegliazion ei ch'il giavisch d'indipendenza dils tschun umens sedifferenziescha da quel dallas tschun dunnas. Simplificau bravamein san ins dir: Per contonscher in bien grad d'indipendenza lessen ils umens sedeliberar da structuras, las dunnas perencunter sedistaccar da persunas.

Bruno refusescha la structura tradiziunala dalla famiglia per saver slargiar la reit sociala. Ina vasta reit sociala munta ina basaemoziunala spaziusa, il beinstar da Bruno sebas en quei cass buca sulettamein sin las relaziuns en famiglia, el sa sepusar sin pliras petgas ed ei consequentamein meins dependents d'ina suletta. Ils cumbats da dus auters umens da nossa retscherca ein drizzai enviers la rolla da nutrider. La fuorma tradiziunala dalla famiglia pretenda ch'igl um s'occupeschi sulets dalla part finanziala, quella obligaziun resentan els sco in enorm squetsch. La fuorma «geniturs simmetrics» lubescha da reparter las pretensiuns finanzialas. Tschels dus umens sedostan enviers ulteriuras cadeinas dalla rolla tradiziunala digl um. Els han negin gust da far carriera e da veser lur affons la damaun in quart d'ura e la sera ina mesa. La fuorma da «geniturs simmetrics» ei per els en emprema lingia ina pusseivladad da haver ina relaziun intensiva cun lur affons.

Las dunnas vulan cunzun sedistaccar da persunas. Lur cumbats per indipendenza sedescargan en las relaziuns cul visavi. Els emprems onns ei quei visavi la mumma. Unisono raquentan las tschun dunnas da dispetas, da nauschs cumbats e carplinas ch'ei ha duvrau per contonscher ina certa autonomia dalla mumma. Il zenit dils cumbats ha liug el temps dalla pubertad. Inaga mitschadas dalla casa paterna e dall'influenza dalla mumma fan elllas tschun ils emprems pass enviers l'atgna veta, per tuttas munta quei ina deliberaziun. La mumma ei l'emprema, denton buca la suletta persuna che periclitescia lur autonomia. Ina secunda e buca meins impurtonta dependenza sentan las dunnas en las relaziuns cun umens. Lur far e damenar ei adina puspei dependents dil meini e dils giavischs dil partenari. Per

ellas eis ei grev da distinguer denter ils agens giavischs e las pretensiuns dil visavi, il pli ferm resentan ellas quei dilemma en las relaziuns culs affons.

Cun la fuorma da «geniturs simmetrics» ein ellas meins ligadas vid ils affons, quella distanza stimeschan ellas sco schanza per daventar pertschartas da lur agens sentiments.

Jeu resumeschel: La fuorma da «geniturs simmetrics» vegn elegida dils umens perquei ch'els lessen sedistaccar da structuras. Dallas dunnas vegn quella fuorma elegida perquei ch'ellas lessen salvar lur autonomia enviers persunas. Las ragischs per quella tenuta differenta denter um e dunna schai en tgina, pretendan psicologas feministas. L'emprema persuna da contact ei decisiva per formar l'identidad digl affon. En la relaziun cugl emprem visavi sviluppescha gl'affon ina idea da siu agen jeu ed ord quella sefuorma sia tenuta enviers il mund.

Pil nievnaschiu ei gl'emprem visavi pil solit la mumma, pia ina persuna feminina. Il fatg che la mumma ei ina dunna ei la raschun daco che l'identidad d'ina buoba sesviluppescha dil tuttafatg autramein da quella d'in buob. Il buob realisescha beingleiti ch'el ei differents dalla mumma. En connex cul complex d'Edipus vegn la simbiosa denter fegl e mumma interruta. Il buob sviluppescha en quei process ina identidad che sedistingua claramein da quella dalla mumma. El ei dalla schlatteina masculina, la mumma dalla feminina.

Dil tuttafatg diversa ei la situaziun dalla buoba. Ella ha la medema schlatteina sco la mumma e sa perquei mai trer aschi clars cunfins denter ella sezza e la mumma. Tgi sundel jeu e tgi eis ti? - quella damonda ei per dunnas bia pli complexa che per umens. Tenor la psicologia dil svilup seformescha il patertgar dallas buobas en ina rama fetg complexa. Lur patertgar selai cumpareglier cun ina reit en la quala in patratg ei colligiaus e dependents da bia auters. Buobs perencunter demuossan ina fuorma da patertgar lineara.

La mumma, gl'emprem visavi, influenescha medemamein la relaziun cun l'autra schlatteina. Tenor la psicologia dependa la relaziun idealia da nossas empremas experienzas, da nossa emprema relaziun. Duront ils emprems meins da nossa veta vegn il maletg dalla relaziun formaus en nus. Sin quei maletg sereferin nus en tut las relaziuns che suondan. Detg empau auter: En tut nossas relaziuns empruein nus da s'avischinar alla relaziun idealia e lezza ei l'emprema, quella cun la mumma. En ina relaziun cun ina dunna anfla igl um ina relaziun fetg semeglionta alla idealia. La constellaziun dallas schlatteinias ei denter um e dunna la medema sco denter fegl e mumma. Auter tier la dunna, en ina relaziun cun in um contonscha ella mai la constellaziun dalla relaziun primara, ina tala anfla ella en relaziun cun in'autra dunna ni cun in agen affon.

La raschun per ina gronda part dils conflicts denter las schlatteinias vesan psicologas feministas el fatg che la relaziun denter um e dunna cuntenta buc il

medem basegns. Ina schanza da superar quels conflicts vesan ellas sch'il bab s'engascha tuttina fetg en la lavur cugl affon. En gliez cass vegness il buob previus dil schoch d'esser divers dalla persuna ton carezada, ferton che la buoba savess formar pli clars cunfins denter ella e siu visavi.

En quei senn ei la fuorma da famiglia «geniturs simmetrics» ina emprova che pudess in di megliurar la capientscha denter las schlattinas, sco Margrit Mitscherlich di:

«Wenn Mann und Frau sich an der Versorgung des Kindes einigermassen gleichmässig beteiligen und beide Geschlechter nicht mit Vorurteilen über das, was als 'weiblich' und 'männlich' gilt, erzogen würden, könnte ... die gestörte Geschlechterbeziehung aufgehoben werden.»